

四庫全書

子部

欽定四庫全書

子部  
山堂肆考卷一百二

詳校官中書

臣孫溶

主事臣祁韻士覆勘

總校官降調編修臣倉聖脉

校對官編修臣沈清藻

謄錄監生臣劉禮

欽定四庫全書

山堂肆考卷一百一

明 彭大翼 撰

人品

忠臣

韓詩外傳忠之道有三以道覆君而化之大忠也以  
德調君而輔之次忠也以是諫非而怨之下忠也周  
公之於成王可謂大忠也管仲之於桓公可謂次忠  
也子胥之於夫差可謂下忠也左傳忠為令德管子

曰忠者臣下之高行

匪躬

易曰王臣蹇蹇匪躬之故

竭力

左僖九年初晉獻公使荀息傅奚齊公疾召之曰以是  
藐諸孤辱在大夫其若之何對曰臣竭股肱之力加之  
以忠貞其濟君之靈也不濟則以死繼之

不事二君

史記燕人入齊聞邑人王蠋賢令軍中曰環畫三十里  
無入使人請蠋曰齊人多高子之義吾以子為將封子  
萬家蠋曰忠臣不事二君烈女不更二夫齊王不聽吾  
諫故退而耕於野國既破亡今又劫之以兵為君將是  
助桀為暴也與其生而無義固不如烹遂經其頸於樹  
枝自奮絕脰而死齊亡大夫聞之曰王蠋布衣也義不  
北面於燕況在位食祿者乎

不事二姓

王莽篡位遣使奉璽書印綬馳馬迎龔勝勝不受曰吾受漢家高厚之恩無以仰報豈以一身事二姓哉

季孫相魯

左成十六年晉人執季文子舍之於苕丘范文子謂欒武子曰季孫於魯相二君矣妾不衣帛馬不食粟可不謂忠乎信讒慝而棄忠良若諸侯何

張良為韓

楚項王以張良從漢王廢韓王成而殺之良遂間行歸

漢綱目發明前此良已歸韓矣至是韓王見殺良乃歸  
漢則子房始終為韓之心益暴白於天下矣

勃蘇晝吟

戰國策吳與楚戰於柏舉三戰入郢寡君身出百姓離  
散焚冒勃蘇曰吾被堅執銳赴強敵而死此猶一卒也  
不若奔諸侯於是贏糧潛行蹠穿膝暴七日而薄秦王  
之朝雀立不轉晝吟宵哭七日不得告瘕而殫悶旄不  
知人秦王聞而走之冠帶不相及左奉其首右濡其口

勃蘇乃蘇秦王身問之禁冒勃蘇對曰吳與楚戰於柏  
舉三戰入郢使下臣來告亡且求救秦王遂以革車千  
乘卒萬人屬之子滿與子虎下塞以東與吳戰於濁水  
而大敗之故勞其身愁其思以憂社稷者禁冒勃蘇是  
也注云瘕狂殫氣絕也

許肅夜哭

許肅列傳肅為晉愍帝侍中劉聰陰行鴆毒帝食之心  
悶欲見肅肅馳詣帝前帝已不能語執肅手流涕肅歔



獻登床帝遂殂肅晝夜號泣哀感異類

縮高全義

綱目安陵人縮高之子仕於秦守管信陵君攻之不下使人召高將以為五大夫執節尉而使攻管高對曰父攻子守人之笑也見臣而下是倍主也父教子倍亦非君之所喜敢辭信陵君怒使謂安陵君生束縮高而致之不然將率十萬之師以造城下安陵君曰吾先君成侯受詔襄王以守此城也手受太府之憲今縮高辭大

位以全父子之義而君曰必生致之是使我負襄王之  
詔而廢太府之憲也縮高聞之曰信陵君為人悍猛而  
自用此辭反必為國禍吾已全已無違人臣之義矣豈  
可使吾君有魏患乎乃之使者舍刎頸而死信陵君聞  
之縞素辟舍而遣使謝安陵君

屈原盡忠

文選楚屈原竭智盡忠蔽障於讒心煩意亂不知所從  
乃往見太卜鄭詹尹以決疑故作卜居

諫吳許成

史記越勾踐使大夫種因吳太宰嚭而行成伍子胥諫  
吳王不聽使子胥於齊子胥屬其子於齊鮑氏還報吳  
王王聞之大怒賜子胥屬鏤之劍以死將死曰樹吾墓  
上以梓令可為器抉吾眼置之吳東門以觀越之滅吳  
也

誑楚解圍

楚圍滎陽益急漢將軍紀信曰臣請誑楚乃乘王者車

出東門曰食盡漢王降楚楚皆之城東觀王乃令周苛守滎陽與數十騎出西門去羽乃燒殺信

依牆而哭

左定四年初伍員與申包胥友其亡也謂包胥曰我必覆楚國包胥曰子能覆之我必興之及昭王在隨包胥如秦乞師立依庭牆而哭日夜不絕聲勺飲不入口秦師乃出

過塚而哀

東漢鮑永字君長行縣過更始塚引車欲下從事諫止之永曰親北面事人何忍車過其墓雖獲罪司隸不避也遂下車哭盡哀

弘演納肝

呂氏春秋狄人逐衛懿公於熒澤盡食其肉獨舍其肝弘演使還哭畢呼天而號盡哀而止因出其肝以內公之肝

申蒯斷臂

劉向新序崔杼弑其君莊公申蒯漁於海將入死之門者以告崔杼令毋內之申蒯曰汝疑我乎吾與汝臂乃斷左臂而與門者以示崔杼杼陳列令入申蒯援劍呼天而鬪

解衣伏質

秦嫪毐作亂伏誅夷三族遷太后於雍萑陽宮殺其二子下令敢諫者死諫而死者二十七人齊客茅焦請諫王大怒按劍而坐口正沫出趨召鑊欲烹之焦遂行至

前曰陛下有狂悖之行四不自知耶車裂假父囊撲二弟遷母於雍殘戮諫士桀紂之行不至是矣今天下聞之盡瓦解無向秦者竊為陛下危之乃解衣伏質王下殿手接之爵以上卿自駕虛左方迎太后歸復為母子如初

正冠坐齋

劉宋沈文秀守東陽魏人圍之三年士卒晝夜拒戰甲冑生蟣蝨無離叛之志至是魏人拔東陽文秀解戎服

正衣冠持節坐齋內魏人執之縛送慕容白曜使之拜  
文秀曰各兩國大臣何拜之有白曜還其衣為設饌鎖  
送平城魏主宥之待為下客

漆身吞炭

見市

啣雪咽旃

漢武帝天漢元年遣中郎將蘇武使匈奴單于欲降之  
不從乃幽武置大窖中絕不飲食天雨雪武啣雪與旃



毛并咽之數日不死匈奴以為神乃徙北海上使牧羝  
曰羝乳乃得歸武杖節牧羝節旄盡落留匈奴十九年  
及還鬚髮盡白

不謀舊國

樂毅去燕之趙趙王欲圖燕泣曰臣事昭王猶事大王  
若獲戾放於他國終身不敢謀趙之徒隸況昭王後嗣  
乎

不忘本朝

唐李世勣父蓋為竇建德所虜世勣走免數日以父故還詣建德降因謀俟建德至河南掩襲其營殺之冀得其父并建德土地歸唐建德久之不至遂與郭孝恪帥數十騎奔唐建德羣臣請誅李蓋建德曰世勣世為唐臣為我所虜不忘本朝乃忠臣也其父何罪乃赦之不用王氏祖臘

見臘日

不受高氏辟署

朱梁以高季昌為荆南節度使西魏依政進士梁震唐末登第歸蜀過江陵高季昌愛其才識留之欲奏為判官震恥之欲去恐及禍乃曰震素不慕榮宦明公不以為愚必欲使參謀議但以白衣侍樽俎可也季昌許之震終身止稱前進士不受高氏辟署季昌甚重之呼曰前輩按依政西魏縣名屬邛州震邛州依政人

奕世忠義

蜀志先主退軍義陽傅彤斷後拒戰兵人多死吳將語

彤令降彤罵曰吳狗豈有漢將軍降者遂戰死拜其子  
僉為左中郎將後為關公都督景曜六年臨危授命論  
者嘉其奕世忠義

一門忠義

梁侯景使侯子鑒陷吳興或勸吳興太守張嶧效袁君  
正迎降嶧嘆曰吾豈不知此難久全但以身許國有死  
無貳耳戰敗還府整服安坐子鑒執送建康景欲活之  
嶧曰吾忝任專城朝廷傾危速死為幸景猶欲存其一

子嶧曰吾一門已在鬼錄不就爾虜求恩景怒盡殺之  
綱目發明曰張嶧明於處死遂使一門為忠義之鬼其  
視袁君正之徒真狗彘之不若也

### 引弓射景

梁侯景愛永安侯確之勇嘗置諸左右及景反邵陵王  
綸潛遣人呼之確曰景輕佻一夫力耳我欲手刃之恨  
未得其便卿還啓家王勿以確為念景與確遊鍾山確  
引弓射鳥因欲射景弦斷不發景覺而殺之綱目書法

侯景之亂武帝子孫臨難無愧永安侯一人而已

奪笏擊泚

唐朱泚反召李忠臣源休姚令言及段秀實議稱帝事  
秀實勃然起奪休象笏前唾泚面大罵曰狂賊吾恨不  
斬汝萬段豈從汝反耶因以笏擊泚面中其額濺血灑  
地忠臣前助泚泚得脫走

出身徇主

周赧王時楚頃襄王病黃歇侍楚太子完於秦與太子

謀曰王疾病而陽文君之子二人在中王若卒大命陽  
文君之子必立為後太子不得奉宗廟矣乃教太子變  
服為楚使者御以出關而自為守舍謝病度已遠乃自  
言請死王怒欲斬之應侯曰歇出身以徇主太子立必  
用歇不如歸之以親楚王從之

以身衛帝

晉惠帝永興元年東海王越奉帝征成都王穎穎遣兵  
拒戰垂興敗績於蕩陰帝頗中三矢百官侍御皆散前

侍中嵇紹朝服登輦以身衛帝兵人引紹斫之帝曰忠臣也勿殺對曰奉太弟令惟不犯陛下一人耳遂殺紹血濺帝衣帝墮於草中亡六璽

受劍銜鬚

范曄後漢書溫序為護羌校尉行部為隗囂將荀宇等所劫序曰受國重任分當効死義不貪生宇賜以劍序受劍銜鬚於口顧左右曰既為賊所迫殺無令鬚汚土遂自殺



引刀刺心

唐田布度軍且亂嘆曰功無成矣即為書謝帝曰臣觀衆意終必負國臣無功不敢忘死願速效元翼毋使忠臣義士塗炭於河朔哭授書於從事李石乃引刀刺心曰上以謝君父下以示三軍言訖而死

恥復仕宋

陶潛自以先世為晉輔恥復屈身後代自宋高祖王業漸隆不肯復仕是歲將復徵之會卒世號靖節先生

示不臣劉

晉安帝義熙十一年太尉劉裕帥師擊荊州都督司馬  
休之休之上表罪狀裕裕密書招休之錄事韓延之延  
之復書曰吾誠鄙劣嘗聞道於君以平西之至德寧可  
無授命之臣乎假令今天長喪亂九流渾濁當與臧洪遊  
地下耳裕視書嘆息以示將佐曰事人當如此矣延之  
以裕父名翹字顯宗乃更其字曰顯宗名其子曰翹以  
示不臣劉氏注云休之嘗為平西將軍故云

哭昭烈廟

魏鄧艾將兵至成都漢後主遣使奉璽綬詣降北地王  
諶怒曰若理窮力屈禍敗將及便當父子君臣背城一  
戰同死社稷以見先帝可也奈何降乎帝不聽諶哭於  
昭烈之廟先殺妻子而後自殺帝別勅姜維使降漢遂  
亡

哭玄元廟

見將帥上

造棺置廳

魏立貴妃高氏為后高肇益貴重用事怨聲盈路羣臣宗室皆卑下之東平王元匡獨與抗衡先造棺置廳事欲輿棺詣闕論肇罪自殺以諫肇惡之竟貶其官後肇伏誅元匡為中尉復治故棺奏任城王澄罪狀廷尉處以死刑詔削官爵而以侯剛代之郎中辛雄奏曰匡歷奉三朝骨鯁之迹朝野具知先帝已容之於前陛下亦宜寬之於後由是復除匡為平州刺史

懷節詣闕

唐以夏侯端為秘書監安撫淮左時河南之地皆入王  
世充唯杞州刺史李公逸為唐堅守世充遣使召端解  
衣遺之送除書以端為淮南郡公端對使者焚書毀衣  
曰夏侯端天子大使豈受王世充官乎汝欲吾往唯取  
吾首耳因解節旄懷之置刃於竿自山中西走晝夜兼  
行得達宜陽詣闕見唐祖但謝無功初不自言艱苦唐  
主復以為秘書監

追還一女

魏以崔楷為殷州刺史楷表乞兵糧不得或勸楷單騎之官楷曰吾獨往將士誰肯固志哉遂舉家之官後葛榮逼城或勸減弱小避之楷遣幼子及一女夜出既而悔之曰人謂吾心不固虧忠而全愛也遂追還賊至將士爭奮曰崔公尚不惜百口吾屬何愛一身

不顧二兒

綱目王世充選騎勇集洛陽屈突通二子在洛唐主謂

通曰今欲使卿東往如卿二兒何通曰臣昔為俘囚分  
當就死陛下釋縛加以恩禮當是時臣心口相誓期以  
更生餘年為陛下盡節今得備先驅二兒何足顧乎唐  
王嘆曰徇義之士一至此乎

為郡乞師

唐玄宗時安祿山反加顏真卿河北採訪使清河客李  
萼年二十餘為郡人乞師於真卿且願資以粟帛器械  
真卿欲與之兵衆以為萼少輕慮必無所成真卿辭之

等就館復為書說真卿曰清河去逆效順奉粟帛器械以資軍公乃不納而疑之僕回轅之後清河不能孤立必有所繫託將為公西面之強敵公能無悔乎真卿大驚遽詣其館以兵六千借之

為國討賊

唐安祿山反常山太守顏杲卿晝夜拒戰糧盡矢竭城遂陷賊將杲卿及表履謙等送洛陽祿山數之曰我奏汝為判官不數年為太守何負於汝而反杲卿罵曰汝



本營州牧羊羯奴天子擢汝為三道節使恩幸無比何  
負於汝而反我世為唐臣祿位皆唐有豈從汝反耶我  
為國討賊恨不斬汝何謂反也祿山怒縛之天津橋柱  
節解以肉噉之罵不絕口賊鉤斷其舌曰復能罵否杲  
卿含胡而死又御史中丞盧奕祀之父也留守東都聞  
祿山之亂遣家屬入京誓以守死及賊至奕朝服持印  
坐廳事以見賊因數其罪臨刑西向再拜罵不空口

卧起抱符

宋洪皓在金時抱印符卧起十五年金人啗以美官略不動心身雖在金心不忘宋嘗以大讐未復為恥

卧起懷印

宋朱弁副王倫使金金將議和當遣一人受書還欲弁與倫探策決去留弁曰吾來自分必死豈應今日覬幸先歸願正使受書歸報天子倫將歸弁謂曰古之使者有節以為信今無節有印印亦信也願留之使弁得暴疾以死死不腐矣倫解以受弁弁受而懷之卧起與俱

金人迫弁仕劉豫弁曰豫國賊吾恨不食其肉又忍北面臣之吾有死耳金人怒絕其餽遺以困之弁固拒驛門忍饑待盡誓不為屈

昂發書几

宋池州守王起宗聞元軍渡江棄官去通判趙昂發攝州事繕壁聚糧為固守計元遊騎至李王河都統張林屢諷之降昂發忿氣填膺瞠目視林林不敢復言已而林帥兵巡江陰遣人納款而陽助昂發為守昂發知事

不濟謂妻雍氏曰城將破吾守臣不當去汝先出走雍  
曰君為忠臣我獨不能為忠臣婦乎元兵薄城昃發晨  
起書几上曰國不可背城不可降夫婦同死節義成雙  
遂與雍氏同縊於從容堂

萬里扁亭

元兵陷饒州知州事唐震及故相江萬里死之初萬里  
聞襄樊破鑿池芝山後圃扁其亭曰止水人莫諭其意  
至是執門人陳偉器手曰大勢不可為余雖不在位當

與國為存亡遂赴止水死左右及子鎬相繼投沼中

### 縱火自焚

宋徐應鑣字巨翁衢之江山人咸淳末補太學生帝熈  
德祐二年元巳延次師皋亭山以帝與皇太后全氏及  
福王等皆北行應鑣與其子鄉貢士曰琦曰崧女元娘  
誓不從太學乃故岳飛第有飛祠應鑣具酒殽祀飛祠  
曰天不佑宋社稷為墟應鑣以死報國誓不與諸生降  
元乃率子女入經德齋登梯雲樓積諸房書冊四周縱

火自焚一小僕見火起至樓下穴牖視之見鑣父子儼坐如塑驚報諸僕壞壁撲滅之鑣得不死與子女怏怏出戶去倉卒莫知所之翌日得尸於祠前井中皆僵立瞪目如生諸僕為具棺殮殯於西湖金牛僧舍

酌酒自縊

宋欽宗至自金營遣劉韜如兩河割地以畀金金人使韓正謂韜曰國相知君今用君矣又曰軍中議立異姓欲以君為正代與其徒死不若北去取富貴韜仰天大

呼曰有是乎歸書片紙使親信持歸報其子羽即沐浴更衣酌卮酒而自縊

引頸受刃

元兵破潭州知州事李芾坐湘熊閣召帳下沈忠遺之金曰吾力竭分當死吾家人亦不可辱於俘汝盡殺之而後殺我忠伏地叩頭辭以不能芾固命之忠泣而許酌酒飲其家人盡醉乃徧刃之芾亦引頸受刃忠縱火焚其居還家殺其妻子復至火所大慟舉身投地乃自

刎幕僚陳億等皆死潭民間之皆舉家自盡城無虛井  
縊林木者相望

浮屍執弓

宋度宗咸淳七年李庭芝使都統張順等救襄陽造輕  
舟百艘乘風破浪直犯重圍至磨洪灘元兵布舟蔽江  
無隙可入順等乘銳斷鐵絙攢棧數百轉戰百二十里  
元兵皆披靡以避其鋒黎明至襄陽城下城中久絕援  
聞順等至踴躍過望及收軍獨失順越數日有浮屍遡



流而上披甲冑執弓矢直抵浮梁視之則順也身中四創六箭怒氣勃勃如生諸軍驚以為神結塚斂葬之

### 立信撫膺

宋江淮招討使汪立信聞賈似道師潰江漢守臣望風降遁嘆曰吾今猶得死於宋土也乃置酒召賓佐與訣手自為表起居三宮與從子書屬以家事夜分起步庭中慷慨悲歌握拳撫膺者三以是失聲三日扼吭而卒後元軍至建康命求其家厚恤之曰忠臣之家也又楊

邦又建炎中倅建康金兵大至公刺血書襟曰寧為趙氏鬼不作他邦臣

文龍指腹

元軍至興化軍知軍事陳文龍使部將林華伺元兵於境上華反導元兵至城下通判曹澄開門降執文龍欲降之文龍指其腹曰此皆節義文章也可相逼耶卒不屈乃械送杭州文龍不食死

求王如溫

帝熈德祐二年楊應奎自元軍還言巴延欲執政面議  
太后遣文天祥與吳堅偕往巴延執天祥北去天祥至  
鎮江夜亡入真州即以書遺李庭芝遣使四出結約庭  
芝疑天祥來說降也使苗再成殺之再成見其忠義不  
忍殺以兵二十人道之如揚天祥變姓名為清江劉洙  
東入海道遇元兵伏環堵中得免二樵者以簣荷天祥  
至高郵嵇家莊嵇聳迎天祥至其家遣子德潤衛送至  
泰州遂由通州泛海如温州求二王按二王者益王衛

王也

負帝赴海

北兵既逼陳宜中張世傑備海舟奉帝熹及衛王昺楊太妃等登舟與北舟相遇值大霧海晦冥不辨舟得以進帝至井澳颶風壞舟帝得驚疾而崩羣臣陳宜中輩多欲散去陸秀夫與衆共立衛王後遷於新會之厓山元張弘範襲厓山世傑兵潰秀夫負帝赴海死之宋遂亡時御舟一白鷗奮擊哀鳴與籠俱墜水以死



山堂肆考卷一百一

欽定四庫全書

山堂肆考卷一百二

明 彭大翼 撰

人品

功臣

周禮夏官司勲掌六卿賞地之法以等其功王功曰  
勲國功曰功民功曰庸事功曰勞治功曰力戰功曰  
多凡有功者銘書於王之太常祭於大烝司勲詔之  
封於營丘

周武王克商封功臣謀士以師尚父為首封於營丘是為齊

封於曲阜

武王封周公旦於曲阜是為魯召公奭於燕餘各以次受封

賜圭瓚

召穆公平淮南夷周宣王賞其功賜之圭瓚秬鬯以祀其先祖山川土地以廣其封邑遂賜之策命



賜弓矢

左僖二十八年晉文公敗楚於城濮獻俘於王王命尹氏及王子虎內史叔興父策命晉侯為侯伯賜之大輅戎輅之服彤弓一彤矢百玃弓矢千秬鬯一卣虎賁三百人按彤赤色之弓玃黑色之弓矢千則弓十可知秬黑黍鬯香酒卣器名

紀於太常

見世宦

藏在盟府

見賞賜

伐陳有功

左僖二十三年楚成得臣伐陳討其貳於宋也遂取焦夷城頓而還子文以為之功使為令尹叔伯曰子若國何對曰吾以靖國也夫有大功而無貴仕其人能靖者與有幾按得臣字子玉大心其子也

獲狄有功

見薦舉

有功於衛

孔氏四代有功於衛至孔悝又有功焉衛莊公美之勒於鼎以旌之也勒鼎見禮祭統

有勞於晉

左昭三年鄭簡公如晉公孫段相甚敬而卑禮無違者晉平公嘉焉授之以策曰子豐有勞於晉國余聞而弗忘賜汝州田以胙乃舊勲伯再拜稽首受策以出君子

曰禮其人之急也乎伯石之汰也一為禮於晉猶荷其  
祿況以禮終始乎按子豐公孫段之父伯石即公孫段  
報滅吳功

越語吳王使王孫雄行成於越范蠡不報於王擊鼓興  
師以隨使者至姑蘇之宮不傷越民遂滅吳乘輕舟浮  
五湖莫知所終越王命工以良金寫蠡狀而朝禮之浹  
日而令大夫朝之環會稽三百里者以為蠡地曰後世  
子孫有敢侵蠡之地者使無終沒於越國皇天后土四

鄉地主正之

賞復楚功

吳戰敗楚師於柏舉遂入郢昭王奔隨申包胥謀復之  
昭王反國賞其功申包胥曰昔為君也今君定矣又何  
求遂逃賞

定功臣位次

漢高祖詔定元功十八人位次皆曰曹參功最多宜第  
一鄂千秋進曰參雖有野戰略地之功此特一時之事

耳上與楚相距五歲失軍亡衆跳身遁者數矣蕭何嘗  
從關中遣軍補其處又軍無見糧何轉漕關中給食不  
乏陛下雖數亡山東何常全關中以待陛下此萬世之  
功也奈何以一旦之功而加萬世之功哉何第一參次  
之上曰善賜何帶劍履上殿入朝不趨封酈侯參封平  
陽侯張敖宣平侯周勃樊噲舞陽侯酈商曲陽侯云云  
完功臣爵土

東漢光武思欲完功臣爵土不令以吏職為過遂罷左

右將軍官耿弇等亦上大將軍印綬皆以列侯就第

剖符定封

漢高以陳平從征伐數出奇計以定天下乃剖符定封以平為戶牖侯

增邑更封

光武建武中大享將士諸功臣增邑更封凡三百六十五人其外戚恩澤封者四十五人定封鄧禹為高密侯食四縣李通為固始侯賈復為膠東侯食六縣已沒者

益封其子孫或更封支庶

勲銘景鐘

國語晉悼公即位曰昔晉克潞氏之役秦來圖敗晉功  
魏顆以身却退秦師於輔氏親止杜回其勲銘於景鐘  
景鐘景公之鐘也

世奉粵祀

漢高五年詔故粵王亡諸世奉粵祀初秦侵奪其地使  
社稷不得血食及諸侯伐秦亡諸身帥閩中兵以佐滅



秦項羽廢而不立至是以為閩粵王王閩中地

圖於麟閣

漢宣帝地節中以戎狄賓服思股肱之美乃圖其人於  
麒麟閣署其官爵姓名惟霍光不名其次張安世韓增  
趙充國魏相丙吉杜延年劉德梁丘賀蕭望之蘇武凡  
十一人

圖於雲臺

東漢明帝永平中思中興功臣乃圖二十八將於南宮

雲臺以鄧禹為首次馬成吳漢王梁賈復陳俊耿弇杜  
茂寇恂傅俊岑彭堅鐔馮異王霸朱祐任光祭遵李忠  
景丹萬修蓋延邳彤鮪期劉植耿純臧宮馬武劉隆又  
益以王常李通竇融卓茂合三十二人馬援以椒房之  
親不與

矜平蜀功

魏鄧艾字士載平蜀功多深自矜伐有識者笑之

論平吳功

晉武帝咸寧元年加羊祜征南大將軍初祜上疏請伐  
吳賈充荀勗馮護為不可祜嘆曰天與不取豈非更事  
者恨於後時哉唯杜預與中書令張華贊成其計未幾  
祜疾篤舉杜預自代而卒及吳平羣臣皆賀上執爵流  
涕曰此羊太傅之功也封拜平吳功臣又策告祜廟封  
其夫人為萬歲鄉君食邑五千戶

圖凌煙閣

唐貞觀十七年詔圖功臣於凌煙閣長孫無忌趙郡王

孝恭杜如晦魏徵房玄齡高士廉尉遲敬德李靖蕭瑀  
段志玄劉弘基屈突通殷開山柴紹長孫順德張亮侯  
君集張公謹程知節虞世南劉政會唐儉李世勣秦叔  
寶等二十四人

圖顯謨閣

宋徽宗崇寧三年圖熙寧元豐功臣於顯謨閣乃王安  
石呂惠卿章惇蔡確之輩

坐安社稷

唐太宗面定勲臣長孫無忌爵邑諸將爭功不已淮安  
王神通曰臣舉兵關西首應義旗房玄齡杜如晦等專  
弄刀筆功居臣上臣竊不服上曰義旗初起叔父首倡  
舉兵蓋亦自營脫禍竇建德吞噬山東叔父全軍覆沒  
劉黑闥再合餘燼叔父望風奔北玄齡等運籌帷幄坐  
安社稷於功行賞固宜居叔父之先

### 收復京城

唐李晟收復京城朱泚亡走其將韓旻斬之以降德宗

車駕還長安以晟為鳳陽隴右節度等使進爵西平王  
魏徵正違

唐太宗宴羣臣謂曰貞觀以前從我定天下間關草昧  
房玄齡功也貞觀以後進忠諫正朕違闕為國家長利  
魏徵力也親解佩刀以賜二人

德裕扞難

唐李德裕以身扞難功流社稷

安集于寘

東漢和帝永元五年以軍司馬班超擊匈奴有功詔曰  
先帝使軍司馬安集于賓以西出入二十三年改立其  
王而綏其人不動中國不煩戎士得遠夷之和同異俗  
之心而致天誅蠲宿恥以報將士之讐其封超為定遠  
侯邑千戶

擊破突厥

唐太宗時突厥入寇王君廓擊破之帝大悅徵之入朝  
賜御馬令殿廷乘之而去又嘗謂侍臣曰君廓往擊竇

建德發憤大呼目與鼻耳一時流血如此壯氣何謝古人不可以常例賞之復賜錦袍金帶還領幽州

受孫皓詣降

晉龍驤將軍王濬以舟師入石頭吳主皓出降武帝封拜平吳功臣王濬王渾爭功不已帝乃進渾爵為公以濬為輔國大將軍封縣侯濬自以功大而為渾父子黨與所抑不勝忿憤益州護軍范通謂曰卿功則美矣而所以居功則未盡善也卿旋旆之日角巾私第口不言



平吳之事若有問者輒曰聖主之德羣帥之功老夫何力之有此蘭生所以屈廉頗也

誘少誠歸國

唐韓全義為淮西行營招討使班師過闕下託疾不入謁令司馬崔放見帝謝無功帝曰全義誘吳少誠歸國其功大矣何必殺敵乃為功耶

功蓋一世

德宗即位以郭子儀禦吐蕃有大功詔攝冢宰賜號尚

父封汾陽王史臣裴均稱其權傾天下而衆不忌功蓋  
一世而主不疑

功被八州

見觀察

平南唐功

宋太祖開寶中潘美以行營諸軍都部征嶺南既平拜  
山南東道節度使復從曹彬平南唐以功拜宣徽北院  
使及征太原討范陽封代國公改忠武節度使進韓國

公謚武惠

平北漢功

太平興國中以平北漢功齊王廷美進封秦王薛居正  
加司空沈倫加左僕射盧多遜兼兵部尚書曹彬兼侍  
中白進超崔翰劉廷翰田重進米信等俱進秩有差

迎鑾功

五代梁太祖自岐還將吏皆賜號迎鑾協贊功臣

啟運功

唐孔緯累遷尚書左僕射賜號持危啟運功臣

義士

傳曰仁者不以盛衰改節義士不以存亡易心

嬰匿趙孤

史記趙朔為屠岸賈攻滅朔有遺腹子朔夫人置兒袴中得脫朔客公孫杵臼謂程嬰曰胡不死嬰曰死易立孤難杵臼曰吾為其易子為其難乃謀取他人嬰兒負之以文褕匿山中嬰謬謂諸將曰吾知趙孤處諸將發

兵隨之公孫杵臼謬呼曰趙氏孤兒何罪請活之諸將  
殺杵臼與孤兒然趙氏真孤乃反在程嬰為匿十五年  
因韓厥立之是為趙武程嬰自殺曰我將下報宣孟與  
公孫杵臼武為服齊哀三年為之祭邑

成匿李孤

見姊妹

與祿助蒸嘗

唐柳仲郢先為牛僧孺辟客後李德裕知其無私奏為

京尹仲郢謝曰不期太尉恩獎及此仰報盛德敢不如  
奇章公門館大中朝李氏有無祿仕者仲郢方領鹽鐵  
特取衛公兄子從質為推官知蘇州院令以祿利贍南  
宅時令狐綯為相不悅仲郢與綯書曰任安不去嘗自  
愧於昔人吳詠自裁亦何施於今日李太尉受責既久  
其家已空遂絕蒸嘗誠可痛惻綯深嘆美與從質正員  
官

分俸贍陵替

李後主葬北邙故吏張泌後官河南每清明親拜其墓  
哭之甚哀李氏子孫陵替者似嘗分俸贍給之

### 贖歸石父

史記越石父賢在縲絏中晏子出遭之途解左轡贖之  
載歸弗謝入閨久之越石父請絕晏子懼然攝衣冠謝  
曰嬰雖不仁免子於厄何子求絕之速也石父曰吾聞  
君子詘於不知已而信於知己者吾方在縲絏中彼不  
知我也夫子既以感悟而贖我是知已知已而無禮固

不如在縲絏中晏子於是延為上客

營歸仲翔

唐郭仲翔元振弟之子也元振以託姚州都督李蒙蒙表為判官時吳保安以仲翔同里見仲翔曰願得因子得事李將軍仲翔力薦之蒙表為掌書記後蒙與姚雋蠻戰敗沒仲翔亦被執蠻人必求千緡乃肯贖會元振物故吳保安欲營歸仲翔苦無貲乃力居貨十年得緡七百都督楊安又以官資助之保安即委與蠻得仲翔



歸後仲翔為代州戶曹保安為彭山丞客死其妻亦沒  
喪不克歸仲翔曰吾賴吳公生吾死今親沒可行其志  
矣乃為服縗經囊骨徒跣負歸廬墓三年後仲翔又為  
嵐風長史迎保安子為之娶妻而讓以官

恥漏名籍

東漢靈帝時復治鉤黨殺司隸校尉李膺等百餘人門  
生故吏並被禁錮侍御史景毅子顧為膺門徒未有錄  
牒不及於譴毅慨然曰本謂膺賢遣子師之豈可漏脫

名籍苟安而已遂自表免歸

專取仁義

東漢山陽高平人張儉亡命困迫望門投止莫不重其名行破家相容後流傳東萊止李篤家外黃令毛欽操兵到門篤引欽就席曰張儉負罪豈得藏之若審在此此人名士明廷寧宜執之乎欽因起撫篤曰遽伯玉恥獨為君子足下如何專取仁義篤曰今欲分之明廷載半去矣欽嘆息而去

致米乞貧民

東漢梁商字伯夏常曰多藏厚亡為子孫累所得俸錢及兩宮賞賜便置中門外未嘗入藏悉分與昆弟中外年凶穀貴多有饑者輒令蒼頭以牛致米及鹽菜錢於四城門外乞貧民不告以姓名

舉柩葬貧士

元杭人王溪月名壽衍字眉叟少為道士後管領浙之開元宮時浙省都事劉時中海內名士也既卒貧無以

為墓眉叟親往弔哭周其遺孤舉其柩葬於德清與已之壽穴相近春秋祭掃不闕人以為難

裴度還帶

裴度字中立河東聞喜人相者謂曰公形神稍異若不貴必餓死度一日度香山寺見一婦人置緹絹於僧欄楯上祈祝良久不取而去度追付不及待亦不至乃挈歸遲明復往寺候之婦人果至公問故答曰父無罪被繫昨告人假得玉帶一犀帶二以賂要津不幸失於此

老父不測之禍無所逃矣度遂還其帶婦人請留其半  
公不受而還之後相者見之大驚曰公陰德及物前程  
萬里非吾術所能知也

思永還釵

宋彭思永字秀長八九歲時晨出就學得金釵於門外  
默坐其處以候訪者有一吏徘徊久之問故果墜釵者  
即付之吏謝以金不受吏嘆駭而去又漁陽竇禹鈞三  
十無子元夕往延慶寺燒香忽於後殿階側拾得銀貳

百兩金三十兩持歸明日詣寺候物主還之後公至諫  
議五子皆登科

散絹助親

見宗族

出金付主

唐李勉字玄卿少貧客遊梁宋與諸生共逆旅諸生病  
且死出白金謂勉曰左右無知者幸君以此為我葬餘  
即君自取勉許諾既葬餘金置棺下後其家謁勉共啓

墓出金付之

不負名賢

晉兵伐吳張巨先督沈瑩諸葛靚等逆之牛渚吳軍大敗靚欲遁去使迎巨先巨先不肯去靚自往牽之曰天下存亡自有大數豈卿一人所支何故自取死辱巨先流涕曰仲思今日是我死日也我作兒童時便為卿家丞相所拔常恐不得其死負名賢知顧今以身徇社稷復何所遁耶莫牽曳我靚流涕放之去數百步見巨先

為晉軍所殺按巨先悌字襄陽人仲思靚字誕之子

為殯孤嫗

晉劉麟之字子驥盛德為當時所推百里外有孤嫗病將死語人曰唯有劉長史當埋我耳子驥親往候之值終為治棺殯

收養孤弱

吳陸瑁字子璋丞相遜族弟官至選部尚書與同郡徐原素不相識原臨死遺書託以孤弱瑁為起墳收養其



子又從父績早亡一子一女皆數歲瑁迎養至長乃別叩解鬪爭

嵇康高士傳高鳳字文通居鄉時鄰里有爭財者持兵而鬪文通往解之不已乃脫巾叩頭請曰仁義遜議奈何棄之爭者投兵謝罪

米困濟之

吳魯肅以賑窮為務甚得邑人歡心周瑜為居巢長將數百人過候肅并告資糧肅家有二困米各二千斛乃

指一圉與瑜瑜益知其奇也遂相結定僑札之分按僑  
札子產季札也

麥舟助喪

宋范純仁少時父文正公遣到蘇州販麥五百斛見故  
人石曼卿三喪未畢留滯丹陽純仁即以麥舟付之單  
騎竟歸至家文正曰東吳見故舊否公道曼卿事曰何  
不以麥舟與之純仁曰已付之矣

乞人填門

東漢尚書令符稚為人樂施乞人填門嘗曰天下物何常吾今日富明日貧耳忽一日不施則意不泰

### 刺客守墓

魏以王慧龍為滎陽太守宋主遣刺客呂玄伯刺之玄伯詐為降人求屏人語慧龍疑之吏探其懷得尺刀玄伯請死慧龍曰各為其主耳釋之後慧龍卒玄伯守其墓終身不去

### 乞分食邑

魏曹真少與宗人曹遵鄉人朱讚並事太祖二人早亡  
真乞分所食邑封二人子詔褒美之

為置產業

張裔字君嗣與楊恭善及恭早死遺孤尚未成人裔迎  
與分屋而居同事恭母恭子長為置產業使立門戶

請兵赴難

曹操圍張超於雍丘超曰惟臧洪當來救吾眾曰袁曹  
方睦洪為袁所表用必不敗好以招禍超曰子源天下

義士終不背本洪時為東郡太守徒跣號泣從紹請兵  
將赴其難紹不與雍丘遂潰超自殺洪怨紹絕不與通  
紹殺之洪邑人陳容少親慕洪時在紹坐起謂紹曰將  
軍舉大事而先誅忠義豈合天意使人牽出謂曰汝非  
臧洪濤空復爾為容顧曰仁義豈有常蹈之則為君子  
背之則為小人今日寧與臧洪同日而死不與將軍同  
日而生遂復見殺在坐無不嘆息

詣獄明冤

晉惠帝時宦人孟玖有寵於成都王穎欲用其父為邯鄲令右司馬陸機固執不可玖深怨之及長沙王乂奉帝與穎戰玖弟超為小督不受機節度輕兵獨戰敗沒玖疑機殺之譖於穎曰機有二心於長沙穎怒使牽秀收機殺之又收機弟雲及司馬孫拯下獄以拯嘗勸機殺超也玖扶穎入催令殺雲夷三族獄吏掠拯數百兩蹠骨見終言機冤玖等令獄吏詐為拯辭亦夷三族拯門人費慈宰意詣闕明拯冤拯譬遣之曰吾義不負二

陸死自吾分卿何為爾耶曰君既不負二陸僕又安可負君固言拯冤玦又殺之

劉鄩申冤

唐李德裕以朋黨抱誣死海上令狐綯久當國更數赦不為復官爵至懿宗立綯去位劉鄩乃申其冤復其官爵世高其義

多祚誅逆

唐張柬之將誅二張以李多祚素有節概可動以義乃

從容謂曰將軍居北門幾何曰三十年矣將軍擊鐘鼎  
食貴重當世非大帝恩乎多祚泣數行下曰死且不忘  
東之曰將軍知感恩則知所以報今在東宮乃大帝子  
而嬖豎擅權危逼宗社國家廢興在將軍答曰苟利王  
室惟公所使乃引天地以自誓東之遂與定謀以敬暉  
李湛為右羽林將軍命總禁兵與多祚王同皎請太子  
至玄武門斬關入及長生殿白武后曰諸將誅逆臣張  
易之張昌宗恐漏大謀不敢豫奏頓首請歸死后病卧



顧李諶曰我遇而父子不薄亦豫是耶

恐負翟黑子

見東宮官

不負賀拔碁

唐王丞相起字舉之再主文柄欲以白敏中為狀元病  
其人與賀拔碁為友碁有文而落拓丞相密令親知通  
意敏中使與碁絕復約敏中為具敏中許之既而碁果  
造敏中門左右給以敏中他適碁遲留不言而去俄頃

敏中躍出呼左右召慙慙以實告且曰一第何門不可致奈何輕負至交相與歡醉而寢前人來見之大怒而去具言於丞相丞相曰我比只得白敏中今當更取賀拔慙矣

餉錢濟餒

劉宋劉凝之隱居荊州年饑衡陽王義季慮凝之餒斃餉錢十萬凝之大喜將錢至市門觀有饑色者悉分與之頃刻而盡

斂錢治裝

宋王回哲宗時為睦親宅講書與司諫鄒浩善劉皇后立浩論之及浩南遷人莫敢顧回獨斂交游錢與治裝往來經理且慰安其母遷者以聞詔下獄衆為之懼回居之宴如御史詰之對曰實嘗預此不敢欺也

收葬生骸

益部耆舊傳王忱字少林詣京師於客舍見書生病甚生曰我命須臾腰下有黃金十斤願以相與乞收葬骸

骨未問姓名因絕恠賣一斤以給棺絮九斤置生棺下  
後恠為大度亭長有駿馬馳入亭而止大風吹繡被墜  
前恠乘馬到雒縣馬逸入他舍主人曰此我家馬也因  
問所由得馬恠具說其狀并及繡被人曰卿何陰德而  
致此恠因言葬書生事主人悵然曰我子也姓金名彥  
大恩久不報天以此彰卿德耳

收瘞陵骨

宋唐珏字玉潛會稽山陰人家貧聚徒授經營滄瀨以

養母元至元十五年戊寅總江南浮屠楊璉真伽怙寵橫行率其黨頓蕭山發宋家諸陵寢斷殘肢體棄骨草莽間珏聞之痛憤亟貸家具并行貸通得白金具酒醪邀里中少年若干輩狎坐轟飲少年起請曰君儒者若是將何為焉珏慘然具以告願收遺骸共瘞之衆謝曰諾乃斲木為櫃復以黃絹為囊各置其表曰某陵某陵分委而散遣之各薊地以藏詰旦事訖來集出白金酬之戒勿泄越七日總浮屠下令哀陵骨雜馬牛枯骼築

一白塔壓之名曰鎮南杭民悲戚不忍仰視了不知陵骨之猶存也明年上元珏出觀燈歸忽坐殞良久始甦曰吾見持書吏來告曰王召君因導我往謁有冕旒坐殿上者數黃衣貴人降揖曰藉君掩骸其有以報珏乃陞陞造王前王謂曰汝受命竄且貧魚無妻若子今忠義動天帝命錫汝伉儷子三人田三頃拜謝而出遂覺自是總浮屠敗以死山陰人始有籍籍傳珏事者未幾越有袁治中為子求師有以珏薦者一見置賓館禮敬

特加情款益篤且語左右曰唐先生家甚寒吾當料理  
使有妻有田不數月二事俱愜珏後獲三子凡夢中神  
所許稽其數無一不合

選士嫁舞女

見寵妾

具貲嫁侍婢

輟耕錄錢伯全嘗納一女鬟丰姿秀雅其室勸伯全私  
之伯全正色曰我所以置此者欲侍中櫛耳汝乃欲敗

吾德耶具貲嫁之

死匿盧子遷

北史魏中書生盧度世字子遷以崔浩事逃在高陽鄭  
羅家羅匿之使者逮羅長子羅戒之曰君子殺身以成  
仁汝雖死勿言其子奉命大被拷掠乃至火爇其體以  
死卒無所言及魏主臨江問宋使者曰盧度世亡命已  
應至彼使者曰不聞魏主乃赦度世後度世自出魏主  
以為中書侍郎度世乃為弟娶鄭羅妹以報德



終養王仁輔

元處士倪瓚字元鎮自先世以來代雄於貲元鎮厭棄  
紛華清修好義其師鞏昌王仁輔老而無嗣奉養終其  
身歿為制服執喪營葬務致誠慤當世稱之

壞室出喪

金兗州平陰人王去非嘗就舉不得意即屏去督妻孥  
耕織以給伏臘家居教授束脩有餘輒分惠於人比鄰  
有喪忌東出西北又皆人居南則去非家也乃壞蠶室

使南出

傾囊辦葬

宋查道字湛然淳化中赴試貧不能上道親戚哀錢三萬遺之道出滑州過父友呂翁家翁無以葬母及兄將鬻其女以辦襄事道傾囊中錢與之又嫁其女

山堂肆考卷一百二

欽定四庫全書

子部

山堂肆考卷一百三十四

詳校官中書<sub>臣</sub>孫 溶

主事<sub>臣</sub>祁韻士覆勘

總校官降調編修<sub>臣</sub>倉聖脉

校對官編修<sub>臣</sub>沈清藻

謄錄監生<sub>臣</sub>劉 禮

欽定四庫全書

山堂肆考卷一百三

明 彭大翼 撰

人品

名士

左傳令名德之興也荀子曰君子務積於身則貴名

起之如日月

天下高士

燕將攻齊聊城拔之或譖之燕王燕將保聊城不敢歸

齊田單攻之歲餘不下魯仲連乃為書約之矢以射城中遺燕將曰為公計者不歸燕則歸齊今獨守孤城齊兵日益而燕救不至將何為乎燕將見書泣三日遂自殺聊城亂田單克之歸言仲連於齊王欲爵之仲連逃之海上曰吾與富貴而詘於人寧貧賤而輕世肆志馬魏王問天下之高士於子順子順曰世無其人也抑可以為次其魯仲連乎

天下奇才

諸葛亮伐魏屯田渭濱有星隕營中而卒亮嘗推演兵法作八陣圖至是司馬懿按行其營壘嘆曰天下奇才也唐杜甫詩功蓋三分國名高八陣圖

名重天下

初齊王封田嬰於薛號靖郭君嬰賤妾之子曰文通儻饒智略說靖郭君以散財養士賓客爭譽其美請以文為嗣嬰卒文嗣位號孟嘗君食客常數千人名重天下  
名稱郡中

漢洛陽人賈誼年十八名稱郡中河南尹吳公舉之

關西孔子

東漢楊震明經博覽無不窮究諸儒語曰關西孔子楊伯起又薛道衡字立卿河東汾陰人收之父也年十三講左氏傳見子產之功作國僑贊其後才名益著裴獻曰自鼎遷河朔吾謂關西孔子罕見其人今復見薛君矣

江左夷吾

晉渡江之後制度草創綱紀未立溫嶠殊以為憂及見王導共譚欣然曰江左自有管夷吾吾復何慮

### 南州高士

東漢徐穉字孺子南昌人郭林宗丁母憂穉往弔置生芻一束而去林宗曰此必南州高士徐孺子也

### 西昌逸士

郎詠隱西昌採樵為業或擔入郡市遇人買則曰我西昌逸士酒中人也我既獻公所缺公當惠我所無



飛將軍

漢李廣隴西成紀人武帝朝拜右北平太守匈奴號之  
曰飛將軍

行秘書

唐虞世南字伯施外謹懦而內抗烈唐太宗時為弘文  
館學士上嘗出行有司請載書以從上曰虞世南在此  
行秘書也

白馬將軍

魏龐德字令明每戰嘗乘白馬人謂之白馬將軍

皂鵬御史

見御史又唐王志愔人呼為皂鵬都督

瘦羊博士

見臘

饑鷹侍中

南北朝魏侍中元暉與盧昶侍寵貪縱時人謂之餓虎將軍饑鷹侍中按饑鷹侍中雖非美名大是的對故存

之

號為儒宗

董仲舒為漢儒宗又宋楊時字中立與游定夫謝顯道俱游明道先生之門學有本原行無玷缺號為一世儒宗

稱為學府

梁傳昭字茂遠歷位戶部尚書博極古今稱為學府

湘中琳琅

見致仕

宅南儀表

南史柳惲字文暢惲之弟早有令名與謝淪鄰居相友善淪曰宅南柳郎可為儀表

今之董狐

見史官吳兢

今之韓愈

見薦舉歐陽修

我家沈任

太原溫子昇博覽羣書文章清婉仕魏為散騎常侍濟  
陰王暉業嘗云江左文人宋有顏謝梁有沈任今我家  
有子昇足以當之

當今潘陸

徐陵仕陳為吏部尚書虞世基一見奇之曰當今潘陸  
以女妻之按潘陸謂潘安陸機兄弟也

江東步兵

晉張翰字季鷹有清才善屬文縱任不拘時人號江東步兵

方外司馬

王昕弟晞字叔朗仕齊為并州長史未嘗以世務為累每遇良辰美景登臨山水以譚燕為事時人謂之方外司馬

曹劉沈謝

唐許敬宗性輕傲見人多忘或謂其不聰乃曰卿自難

記若遇曹劉沈謝暗中摸索著亦可識也

王楊盧駱

唐盧照鄰字昇之范陽人文章與王勃楊炯駱賓王等  
齊名時稱王楊盧駱炯曰吾愧在盧前恥居王後

江東獨步

晉王坦之字文度述之子也弱冠與謝安郗超皆有重  
名時語曰大才槃槃謝家安江東獨步王文度盛德日  
新郗嘉賓又謝莊字希逸作鸚鵡賦袁淑見之曰江東

無我卿當獨步我若無卿亦一時之傑

浙西高選

見幕官

風裁獨特

東漢李膺字元禮桓帝時拜司隸校尉獨特風裁以聲名自高人有被其容悅者名為登龍門又晉王衍口中雌黃朝野謂之一代龍門唐皇甫湜與韓愈文章德望為一代所宗人號為一代龍門有能接見者名為登龍



門

風節並著

宋江公望字民表徽宗朝除左司諫與王縉並以風節  
著稱抗疏極論時政累數百言有云一池四監未知其  
孰守十羊九牧未知其孰從願陛下不以先入已信之  
言宿於心不以未入遽告之言拒於耳決事如析薪從  
理如破竹上稱奇者數四

名重軍中

五代謝彥章臨敵御衆肅然有威左右馳驟疾若風雨  
晉人望其行陣整齊相謂曰彥章必在此也其名重軍  
中若此又苕溪漁隱蘇子由奉使契丹寄子瞻詩云誰  
將家集過幽都每被行人問大蘇莫把文章動蠻貊恐  
妨譚笑卧江湖蓋子瞻名重當代外至夷人亦愛服如  
此之重也

名播海內

世說盧志於衆坐問陸士衡曰陸遜陸抗是君何人答

曰如卿於盧毓盧珽士龍失色既出謂兄曰何至如此  
彼容不相知也士衡正色曰我祖父名播海內寧有不  
知鬼子敢爾議者疑二陸優劣謝公以此定之按志字  
子通珽少子毓之孫也

干將鏌鋁

唐李邕字泰和揚州人才藝出衆盧藏用嘗語之曰君  
如干將莫邪難與爭鋒然終虞缺折耳邕不能用

南金東箭

東晉顧榮人稱為南金東箭世胄高門

門中龍鳳

南史王僧虔戒子書曰吾家門中優者如龍鳳劣者如虎豹

廢中騏驎

杜廣初為劉景廢卒景問其意廣申敘有條景執其手曰吾久負賢者因告其妻曰為女求夫三年不覺廢中有騏驎遂以女妻之後廣為商州刺史又宋徐勉字修

仁徐孝嗣見之曰此人中騏驎必能致千里

北州人豪

東漢曹節王甫竊弄神器固天下所同嫉竇武以至親操重柄勦除奸凶其勢易矣然而身敗功頽貽國後患者幾事不密而禍成於猶豫也張奐北州人豪素非中人之黨武不能收為已用而乃遲回達旦使逆賊得以欺奐而使之豈不惜哉又皇甫規自負西州豪傑恥不與黨人

南陽人傑

晉鄒湛字潤甫少以才學知名實南陽之人傑也

白衣尚書

東漢鄭均字仲虞任城人章帝建初中徵拜尚書數進忠言以病告歸帝東巡過任城乃幸均舍賜尚書祿以終其身時號白衣尚書又宋仁宗時有何羣者嗜古好學善激揚人目為白衣御史

青錢學士

唐張鷟字文成高宗朝八以制舉皆中甲科員半千稱其文猶青銅錢萬選萬中時號青錢學士又青錢學士可對黑稍將軍六朝于栗碑少習武藝材藝過人劉裕嘗遺其書題曰黑稍公麾下栗碑好持黑稍故有其號明元因授為黑稍將軍

龍駒鳳雛

見兄弟

金山玉海

梁朱异字彦和徧覽五經明山賓表薦之云金山萬丈  
緣涉未登玉海千尋窺映不測武帝朝拜侍中

名動衣冠

北齊邢劭字子才在洛陽專以山水自娛不暇勤業飲  
譴既倦方尋經史時霖雨讀漢書五日便能徧記年未  
二十名動衣冠文章獨步當世每一文出京師為之紙  
貴

名聞宮禁



宋王樞密疇之夫人梅鼎臣之女也景德初夫人入謝  
慈聖宮太后問曰夫人誰家子對曰梅鼎臣之女太后  
笑曰是聖俞家子由是始知聖俞名聞於宮禁也按聖  
俞名堯臣

願識荊州

唐韓朝宗思復之子玄宗時為荊州刺史李白與書曰  
白聞天下譚士相聚而言曰生不用封萬戶侯但願一  
識韓荊州何令人景慕至此耶

願見待制

宋劉安世字器之號元城市井細民以為若過南京不見劉待制如過泗州不見大聖

得聲梁楚

史記漢曹丘生揖季布曰楚人諺曰得黃金百斤不如季布一諾足下何以得此聲於梁楚之間哉又鄭當時以任俠自喜脫張羽於阬聲聞梁楚間

知名東南

宋龍大初工詩王荊公退居與郭功父坐有士人上謁  
視其刺則曰詩人龍大初功父叱之曰相公前敢稱詩  
人令賦沙詩頃之即云茫茫黃出塞漠漠白鋪汀鳥去  
風平篆潮回日射星功父閣筆由是知名東南

人中龍

晉宋纖字令父燉煌人隱於酒泉南山太守馬岌具威  
儀鏡鼓造之纖拒而不見岌嘆曰名可聞而身不可見  
德可仰而人不可覩知先生人中之龍也銘詩石壁曰

丹崖百丈青壁萬尋奇木梢鬱蔚若鄧林其人如玉維  
國之琛室邇人遠實勞我心

殿上虎

宋劉安世元祐中為中書舍人面折廷諍人目之為殿  
上虎紹聖初為章惇蔡卞所忌遂謫嶺外人言春循梅  
新與死為鄰高廉雷化說著也怕八州惡地公厯遍其  
七蘇東坡曰劉器之真鐵漢不可及也

名題殿柱

宋陳恕字仲言太宗朝為三司使御筆題殿柱曰陳恕真鹽鐵使後封晉公

名動天闕

陳搏亳州真源人嘗戒門人种放曰子他日遭逢明主名動天闕夫名者古今美器造物者深忌之天地間無完名子名將有物毀之耳放晚節侈飾過度營產滿雍鎬間遂喪清節

金玉君子

宋傅堯俞字欽之元祐中拜中書侍郎名重朝廷風節  
凜然太皇太后曰傅侍郎清直一節終始不變金玉君  
子也又章才劭篤學能文世稱為篤實君子喜吟詩有  
過清遠峽詩岩頭風急樹欹斜江畔漁樵十數家老盡  
往來名利客年年秋水映蘆花

忠孝狀元

宋鄭獬字毅夫皇祐五年上御崇政殿試園丘方澤象  
天地賦擢進士第一試前一日上焚香祝曰願得忠孝

狀元遂得獬

開元賢相

唐開元中賢相前有房杜後有姚宋

元祐名臣

宋王存字正仲恂恂不為詭激至於事所當行確不可奪呂希哲薦為元祐名臣

水北山人

唐韓愈寄盧仝詩水北山人得名聲去年去作幕下士

水南山人又繼往鞍馬僕從塞間里按水北山人謂石  
洪水南山人謂溫造

江南夫子

宋蔡用之筠州人天禧中登第上萬言書上喜曰朕徧  
觀天下奇才偉器未有如用之者出文以示諸學士曰  
此江南夫子也

真儒者

唐裴休字公美能文章善書法為人醞藉進止雍容宣



宗嘗稱曰真儒者

真先生

宋嘉祐中有四真之目富彥國真宰相包希仁真御史  
歐陽永叔真學士胡翼之真先生又元伯顏稱廉希憲  
曰宰相中真宰相男子中奇男子

北人圖形

宋韓琦字稚圭所歷諸鎮皆有遺愛戎狄尤畏公威名  
凡使契丹及契丹來使者必問韓侍中安否今何在後

琦子忠彥使漠北遼主問左右云孰屢使南朝識韓侍  
中今忠彥貌類父否或曰頗類乃即宴坐命畫工圖之  
而去

西賊破膽

見將帥下

後來王桀

唐蘇晉珣之子數歲知為文作八卦論吏部侍郎房穎  
叔秘書少監王紹宗嘆曰後來之王桀

再世希夷

宋陳濟字元德號風岡守正不仕晚歲樂希夷大僊之道人稱再世希夷

神智人

北史史寧字永和少以軍功加持節征東將軍突厥憚之曰此中國神智人也

忠清君

宋游道少有氣節仕魏為殿中侍御史戒其子仕約仕

慎仕素曰吾執法太剛子孫不足為師也兗州人為立  
生祠題曰忠清君

山東六儒

隋竇仕榮馬光張仲讓孔龐張買奴劉祖仁皆山東文  
學之士也開皇初並徵授太學博士號為六儒

會稽四族

世說會稽孔沈魏顗虞存謝奉並是四族之雋孫興公  
目之曰沈為孔家金顗為魏家玉虞為長琳宗謝為弘

道伏按長琳存字弘道奉字言虞氏宗長琳之才謝氏服弘道之美也

大厯十才子

唐盧綸字元言與韓翃錢起李端司空曙吉中孚崔峒耿偉夏侯審苗發皆能詩號大厯十才子

熙寧三舍人

綱目宋熙寧中李定言新法甚便於民王安石薦於帝拜監察御史裏行知制誥宋敏求蘇頌李大臨言定不

由銓考擢授朝列隳秦法制所益者小所損者大封還制書詔諭數四頌等執奏不已並坐屢格詔命落知制誥天下謂之三舍人

### 涼州三明

東漢太尉段熲字紀明度遼將軍皇甫規字威明大司寇張奐字然明並知名顯達京師稱涼州三明晉南渡後瑯琊諸葛恢賴州荀閭陳留蔡謨俱字道明號中興三明人為之語曰京都三明各有名蔡氏儒雅諸葛清

京師二穉

東漢周澤字穉都孫堪字子穉京師號二穉

一代風騷

唐鄭谷幼有名譽司空圖見而奇之因拊其背曰當為  
一代風騷又唐李靖以疾遜位上曰朕嘉公意欲以公  
為一代模楷故不相違

一代冠冕

宋韓維字持國與司馬文正公呂正獻公王荊公為四

友名家文獻政事文學為一代冠冕

六君子

宋理宗寶祐中丁大全既逐右丞相董槐益恣橫用事  
道路以目太學生陳宜中黃鏞林則祖曾唯劉黻陳宗  
六人上書攻之大全怒遣御史吳衍劾之削其籍編管  
遠州立碑三學戒諸生勿得妄議國政士論翕然稱宜  
中等號為六君子

四先生



宋陳襄字述古與鄉士陳烈周希孟鄭穆為友四人者  
氣古行高磨礪礪琢相期以天下之重為已任時謂之  
四先生述古嘗知河陽縣富公鎮河陽凡燕游登臨必  
與之俱吟詠樽俎更唱迭和每曰陳著作作奇才也又謝  
良佐與游酢楊時呂大臨號程門四先生

北朝四雋

北魏高濟與邢穎李熙游雅號北朝四雋又六朝何妥  
字棲鳳與蕭春俱有雋才安居白楊巷春居青楊巷世

號兩雋又晉薛兼與紀瞻閔鴻顧榮賀循齊名號為五雋

南山三友

宋高懌字文悅聞种放隱終南山懌亦築室豹林谷與張堯許勃號南山三友

荀氏二仁

文中子曰荀氏有二仁生也以濟時死也以明道按二仁謂荀彧荀攸也彧字文若舉孝廉何顥見而奇之曰

王佐才也後為曹操謀臣及操受九錫或飲藥卒攸字公達或從子從曹操征伐獻奇策十二操曰公達人之師表

楊家三喜

唐楊憑字虛受與二弟凝凌俱有重名大厯中登第稱三楊時謂楊家三喜又何肩字子秀遊會稽若耶山雲門寺二兄求點並棲遁世號點為泰山肩為小山求為東山是謂何氏三高

海內一人

北史杜正玄字知禮耽志經史隋世舉秀才試策高第  
時謂海內一人

斗南一人

唐狄仁傑同府參軍鄭崇質母老且疾當使絕域仁傑  
詣長史蘭仁基請代行仁基咨嗟其誼每曰狄公之賢  
北斗以南一人而已又仁傑初舉明經調汴州參軍為  
吏所誣訴黜陟使閻立本召訊異其才謂曰仲尼稱觀

過知仁君可謂滄海遺珠矣

八司馬

唐元和初劉禹錫程異陳諫柳宗元韓泰韓曄凌準韋執誼八人皆附王叔文而進者及叔文敗八人皆貶為遠州司馬故云

四學士

宋黃庭堅秦觀張耒晁補之皆游蘇軾之門號四學士

濟北五龍

濟北英賢傳紀昭戴所徐宴夏隱劉彬時號為濟北五龍按紀昭漢桓靈時人又晉索靖字幼安燉煌人少有逸羣之量與汜衷張彪索紞索永俱詣太學馳名海內號燉煌五龍其餘五龍八龍詳見兄弟

### 江東三虎

宋楊億作文與賓客飲博投壺奕棋語笑喧譁不妨緯思以小紙細書運筆如飛文不加點頃刻數千言真一代文豪也與王鼎王緯號江東三虎

鉅下二卿

東漢馬嚴字威卿弟敦字孺卿援兄子也居鉅下交結英賢知名當世三輔稱其行義號鉅下二卿

吳中四士

唐包融開元中為集賢學士與賀知章張若虛張旭齊名號吳中四士

建安七子

魏文典論魯國孔融文舉廣陵陳琳孔璋山陽王粲仲

宣北海徐幹偉長陳留阮瑀元瑜汝南應瑒德璉東平  
劉楨公幹斯七子者於學無所遺於辭無所假號建安  
七子

景祐四賢

宋余靖字安道宋景祐中右正言范文正以言事忤大  
臣落職靖為上書謫監筠州酒稅尹洙歐陽修抗疏亦  
遠謫士大夫號為四賢蔡襄作四賢一不肖詩一不肖  
指高若納也又喬執中以經術教授與孫莘老秦少游



齊名時號三賢

潯陽三隱

陶靖節居柴桑周續之入廬山劉遺民入匡山時號潯陽三隱

江西三瑞

宋蕭定基字平一景祐中為殿中侍御史仁宗嘗題殿柱云彭齊之文章楊丕之清操蕭定基之政事為江西三瑞云

飲中八仙

杜甫有八仙歌謂李白賀知章李適之汝陽王李璣崔  
宗之蘇晉張旭焦遂也

幕中六客

唐杜鴻漸張鎰喬琳陳少游杜黃裳高郢六人皆郭汾  
陽王幕中客也後俱拜相

謝家千金

宋謝朓字敬沖十歲能屬文琅琊王景文謂其父莊曰

卿子足稱神童莊笑撫臍背曰吾家千金至宋末領秘書監

陸氏雙壁

見兄弟

一代偉人

魏鍾繇字元常封平陽侯一代偉人也文帝嘗賜之五熟釜銘善草書若飛鴻戲海舞鶴遊天又北魏高允字伯恭崔宏見而異之曰高子黃中內潤文明外照必為

一代偉器

一代大儒

宋姜潛石守道門人也呂希哲薦潛及王回吳回張載  
為一世大儒

一臺二妙

晉衛瓘字伯玉咸寧中加侍中時索靖為尚書郎俱善  
草書號一臺二妙

一門三秀

杜正倫相州人隋世舉秀才天下不十人而正倫一門  
三秀為世歆羨

三河領袖

裴駿字神駒魏太武曰裴駿忠義可嘉補中書博士崔  
浩目為三河領袖又裴秀字季彥八歲能屬文時語曰  
後進領袖有裴秀

歷世名節

唐袁誼為蘇州刺史司馬張沛嘗白誼曰州得一長史

隴西李亶天下甲門也誼曰夫甲門者歷世名節為天下所高老夫是也山東人尚婚媾求祿利耳至見危授命則無人焉何足尚耶沛大慙

時號三君

東漢陳紀字元方弟諶字季方與父寔並著高名時號三君又桓靈時黨人劉淑陳蕃竇禹為三君

時號四將

宋劉光世與張俊韓世忠岳飛時號中興四將

四休居士

宋孫昉字景初為太醫自號四休居士黃山谷問其說  
對曰麤茶淡飯飽即休被破遮寒暖即休三平二滿過  
即休不貪不妬老即休

三影先生

宋張先字子野詩筆老健倅秀州創花月亭其詞中警  
句雲破月來花弄影浮萍斷處見山影隔牆送過秋千  
影世號三影先生神宗朝為尚書郎又因話錄應子和

詩有兩岸夕陽紅風過落花紅蠟炬短燒紅之句人  
號三紅秀才

二十四賢

宋真宗景德元年密采羣臣有聞望者得二十四人召  
對崇政殿置於臺省館閣比唐修文館學士號為二十  
四賢邊肅鞠仲謀郝太沖朱協李玄馬京何亮衛太素  
陳昭度崔端趙湘姜嶼滕涉曹廣周絳謝濤高謹微張  
若谷陳越皇甫選陸玄圭李奉天崔遵度原本遺失一



人俟更考

二十四友

見朋友

百紙參軍

唐杜暹明經擢第補婺州參軍秩滿歸吏以紙萬番贐之止受百番衆嘆曰此與昔清吏受一大錢者何異哉時號百紙參軍

七字舍人

宋呂湊字濟叔寶元中試鯤化為鵬詩九霄離海嶠一  
夕過天池時有三魁謂呂湊王昂李易也仁宗見詩升  
湊為第一後為中書舍人喜自貴重見賓客不及數言  
時號七字舍人

人比二陸

陳虞世基與弟世南俱歸隋人比二陸博學有俊才善  
草隸孔奐見之嘆曰南金之貴屬在斯人

人比二疏

見孫

世號小鍾

唐鍾紹京繇十代孫工草書世號小鍾

人號小杜

唐杜牧之詩情豪邁人號小杜以別杜甫云

小東坡

宋趙達資州人累遷至中舍高宗以其文章似蘇軾人號為小東坡有棲雲集行世

小由基

宋陳堯咨善射人號小由基

大秦小秦

唐秦景道與弟暉皆精漢書時號大秦小秦

大任小任

宋任孜字道聖眉州人慶厯三年楊宣榜登第第級字師中嘗通判黃州兄弟俱有名蘇東坡謂之大任小任且贈之詩曰大任剛烈世無有疾惡如風朱伯厚小任

溫毅老更文寬柔慈愛小馮君攷之子伯雨元符中除  
正言上章論章惇蔡卞坐黨被貶

四傑

宋韓范富歐人號四傑

三豪

宋杜默字師雄豪于歌石曼卿豪于詩歐陽永叔豪于  
文世號三豪

二絕

宋世軌仕魏為大理少卿執法寬平時蘇珍之為大理  
正明敏能斷寺中語曰決定嫌疑蘇珍之視表見裏宋  
世軌人稱為寺中二絕

三奇

宋彭淵材家宜豐元豐間人與洪覺範鄒元佐三人號  
新昌三奇覺範奇于詩元佐奇于命淵材奇于樂

李杜

東漢桓帝時李固杜喬李雲杜衆李膺杜密唐玄宗時

李白杜甫俱齊名

陰何

陰鏗字子堅武威人博涉史傳尤善五言詩仕梁為湘東王法曹參軍與何遜齊名有陰何詩集行於世號陰何體

元白

唐元稹字微之能詩與白樂天齊名時稱元和體宮中呼為元才子樂天嘗與之書曰江南語才子必曰元白

以子之故使我不得獨步於吳越間今垂老復得劉孟  
德豈非大不幸耶

徐庾

徐陵字孝穆摛之子也庾信字子山為文綺麗後進競  
相模範盛為都下所稱號徐庾體

發越

梁顧越學兼經史與賀元發名相等都下謂之發越

錢郎



郎士元晚唐詩人與錢起齊名時語曰前有沈宋後有錢郎

蘇李

唐蘇味道與里人李嶠俱以文翰顯人號蘇李

江高

後唐江文蔚字君章長興二年進士後歸南唐與高越俱以能賦擅名江表人稱江高

裴馬

唐馬載與裴行儉分掌選事言吏部得人者稱裴馬

郝婁

唐武后時酷吏殘鷙人不聊生獨婁師德能以功名始終與郝處俊相亞世言長者稱郝婁

李郭

唐李光弼平安史亂與郭子儀齊名

畢曹

唐畢誠與曹確同為相俱有雅望世謂畢曹

燕許

唐蘇頲字廷碩封許國公張說字道濟封燕國公俱以文章顯名時號燕許大手筆

楊劉

見翰林學士

蘇黃

宋黃庭堅晚節位益黜名益尊世人以配蘇軾謂之蘇黃

孫丁

宋丁謂嘗以文謁王禹偁禹偁稱其文與孫何可比韓柳名遂大振又嘗言二人可使白衣充修撰

三鄒

鄒忌以鼓琴見齊王王喜之後為齊相齊有三鄒子前鄒忌次鄒衍後鄒奭俱有名於時

二鮑

東漢鮑永字君長光武朝拜司隸辟鮑恢為從事不避

彊禦帝曰貴戚且斂手以避二鮑

三蘇

宋蘇老泉父子文章名擅天下世稱三蘇

三孔

宋孔文仲與弟武仲平仲俱以文章名世人號三孔

三劉

宋劉敞字原父弟放字貢父敞子奉世字仲馮是為三劉又劉渙字凝之號西澗子恕字道原恕子義仲亦稱

三劉劉夙字貫之莆田人弟朔字復之貌如其兄夙峭壁萬仞朔濟以和俱有聲於時人號二劉

三李

宋李公麟元符中歸老作龍眠山莊圖自號龍眠居士又與二弟公庾元中號龍眠三李

山堂肆考卷一百三